

## Ene trace dè claû.

Il avoût in coûp in gamin avû in vramint sale foutu caractère: qué sale djône què cî ça!! n'sondjoût foque à maû fai: arrachî les ailes des mouches, spotchî des guernouilles, louyî des cass'roles à l'queue des cats, d'in passe èyè des co pu surtes. Bref, l n'avoût nî in bon plan dins s'tiesse.

El père vèyoût bîn qu'l'infant n'astoût nî fiér dè yesse ainsi; il aroût putôt sté malheureux.

In djoû, il a app'lé l'djambot èyè l li a dit: «V'là in martia èyè in gros saclot d'claûs. Chaque coûp què vos pierdrèz pasyince, chaque coûp qu'vo z'arèz invie d'maû fai, chaque coûp qu'vo pins'rèz à fait dè l'peine à n'saqui, vo dirèz plantér in claû dins l'barrière du djardin. Tapèz foûrt pou bîn les infoncér èyè vo roublîrèz vos noirès z'intentions.»

El prumî djoû, el gamin a planté ène vingtaine dè claûs!

Après n'semaine scrandissante il a appris à s'dominér, à s'controlér èyè il in plantoût d'moins in moins. l comperdoût què çî pu facile dè fai in effoûrt putôt qu'd'infoncér des claus, surtout què l'barrière î in vî kène, pu dure qu'in caillaû.

Après saquant z'années, il est v'nu dire à s'pa: «Du vos rapporte el martia èyèç'qu'l d'meûre comme claûs: Ca fait djà lômint què du n'd'ai pu yeu dandjî. D'ailleûrs, l n'a pus wére dè claûs dins l'saclot.»

«C'est bîn m'gamin qu'il a répondu l'père. Mèt'nant, chaque djoû què vo n'arèz rîn à vo r'prochî, vo z'in r'saqu'rèz sept.»

Là ètou, il a fallu in bon moumint vu l'nomb' dè claûs mais pou fini, el gamin (dèv'nu homme) est v'nu dire : «Ca y est pa, l n'a pus d'claû dins l'baille.»

El père, vieillissant, a pris s'n'infant pa l'espale èyè il l'a amin-né pad'avant l'barrière: «Em'fieu, du sûs fiér dè vous mèt'nant mais ravisèz bîn l'baille: es' baille-la èn's-ra pus jamais comme avant: chaque claû a laichî in traû èyè elle est comme si elle avoût sté attaquée pa les viérs.



Dins l'vie,ç'est l'min-me:chaque coûp què vo f'réz ène mèchanç'té à n'saqui, vo li plant'réz in claû èyè vo li laich'réz n'blessure comme les traûs dins l'baille.Vo z'ârez beau ersaquî l'claû in vo z'escusant,in d'mandant pardon,el traû s'ra toudi là èyè I n'sè r'frum'ra jamais tout à fait!

In pusse,si ç'est n'blessure què vo z'avèz fait avû n'parole,elle s'ra co pu douloureuse què si cî avû in coutia!

En'roublyéz jamais què les amisses,les vrais,I n'd'a nî branmint.Vo povèz comptér su vos doûgts les cîs qui vo rimbellis'té l'vie,qui vo support'té,qui sont toudi là pou vo assistér si vo sté dins l'imbaras.

Si vo lun plantéz trop d'claûs ou bîn trop souvint,I vont tout fai pou n'pus cwoisér vo route èyè in bia djoû,vo vo r'trouv'réz tout seû avû vo martia èyè ç'qu'I vo d'meûre comme claûs mais vo n'ârez pu d'planque pou les intassér.Non,wardèz vo martia dins vo poche èyè laichèz l'saclot d'claûs su vo guernî.

Mieux qu'ça:Faîtes comprind' à vos vrais z'amisses què si par malheûr (èyè put-ê't sans l'fai esprès) I vo plant' t'in claû,vo n'lun tourn'réz nî l'dos. In mettant n'langue dins no bouche,el Bon Dieu nos z'a donné in osti formidab'mais pou yesse heureux dins l'vie,I faut in d'morér maisse.>

Françwès.

Louyî = lier:surtes = sures/claû = clou/saclot = sachet/scrandissant = fatigant/avoû dandjî = avoir besoin/pus wére = plus beaucoup/ersaquî = retirer/baille = barrière-portail/planque = planche/guernî = grenier.